



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ

Ո Ր Ո Շ ՈՒ Մ

27 օգոստոսի 2024 թվականի թիվ 502-Ա

«ՀԱՅՐԵՆՅԱՑ ԲԱՐԻՔՆԵՐ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ՆԿԱՏՄԱՄԲ ՊԱՏԱՍԽԱՆԱՏՎՈՒԹՅԱՆ ՄԻՋՈՑ ԿԻՐԱՌԵԼՈՒ ՄԱՍԻՆ

Մրցակցության պաշտպանության հանձնաժողովը (այսուհետ նաև՝ **Հանձնաժողով**) 2024 թվականի օգոստոսի 27-ի նիստում, քննարկելով «Հայրենյաց բարիքներ» սահմանափակ պատասխանատվությամբ ընկերության (այսուհետ նաև՝ **Ընկերություն**) նկատմամբ պատասխանատվության միջոց կիրառելու մասին հարցը,

Պ Ա Ր Զ Ե Ց

1. Վարույթի ընթացքի հակիրճ նկարագրությունը.

Հանձնաժողովի 2024 թվականի հունիսի 11-ի ««Հայրենյաց բարիքներ» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտումների վերաբերյալ վարույթ հարուցելու մասին» թիվ 259-Ա որոշմամբ (այսուհետ նաև՝ **թիվ 259-Ա որոշում**) հարուցվել է թիվ ՀԳ-02404/24 վարույթը (այսուհետ նաև՝ **թիվ ՀԳ-02404/24 վարույթ**):

Հանձնաժողովի 2024 թվականի հունիսի 17-ի ««Արաս Ֆուդ» սահմանափակ պատասխանատվությամբ ընկերության և «Հայրենյաց բարիքներ» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտումների վերաբերյալ վարույթ հարուցելու մասին» թիվ 308-Ա որոշմամբ (այսուհետ նաև՝ **թիվ 308-Ա որոշում**) հարուցվել է թիվ ՀԳ-02607/24 վարույթը (այսուհետ նաև՝ **թիվ ՀԳ-02607/24 վարույթ**):

Հանձնաժողովը 2024 թվականի օգոստոսի 13-ին ընդունել է «Թիվ ՀԳ-02607/24 վարույթով պատասխանող «Արաս Ֆուդ» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման

վերաբերյալ վարույթն առանձնացնելու, «Հայրենյաց Բարիքներ» սահմանափակ պատասխանատվությամբ ընկերության կողմից ներկայացված միջնորդությունը բավարարելու և արագացված վարույթ կիրառելու մասին» թիվ 479-Ա որոշումը (այսուհետ նաև՝ **թիվ 479-Ա որոշում**):

Հանձնաժողովը 2024 թվականի օգոստոսի 13-ին ընդունել է «Թիվ ՀԳ-02404/24 վարույթով պատասխանող «Հայրենյաց բարիքներ» սահմանափակ պատասխանատվությամբ ընկերության կողմից ներկայացված միջնորդությունը բավարարելու և արագացված վարույթ կիրառելու մասին» թիվ 480-Ա որոշումը (այսուհետ նաև՝ **թիվ 480-Ա որոշում**):

Հանձնաժողովը 2024 թվականի օգոստոսի 20-ին ընդունել է ««Հայրենյաց բարիքներ» սահմանափակ պատասխանատվությամբ ընկերության վերաբերյալ թիվ ՀԳ-02607/24 և թիվ ՀԳ-02404/24 վարույթները միացնելու մասին» թիվ 492-Ա որոշումը:

2. Վարույթի հարուցման առիթի և հիմքի հակիրճ նկարագրությունը.

Հանձնաժողովի անբարեխիղճ մրցակցության վերահսկողության վարչությունը 2024 թվականի մայիսի 31-ի թիվ 6028 զեկուցագրով առաջարկել է Ընկերության կողմից տնտեսական մրցակցության բնագավառում իրավախախտման հատկանիշների առկայությունը պարզելու նպատակով հարուցել վարույթներ:

Թիվ ՀԳ-02404/24 վարույթը հարուցվել է Ընկերության կողմից 2023 թվականի դեկտեմբերի 6-ին արտադրված «Эко Солт» և 2023 թվականի դեկտեմբերի 10-ին արտադրված «MG FOOD» ապրանքային նշաններով տոմատի մածուկների առնչությամբ Ընկերության վարքագծում անբարեխիղճ մրցակցության, այդ թվում՝ հասարակության մոլորեցման դրսևորումներով անբարեխիղճ մրցակցության հատկանիշների առերևույթ առկայության հիմքով:

Թիվ ՀԳ-02607/24 վարույթը հարուցվել է «Արաս ֆուդ» սահմանափակ պատասխանատվությամբ ընկերության (այսուհետ նաև՝ **«Արաս Ֆուդ» ընկերություն**) պատվերով Ընկերության կողմից 2023 թվականի օգոստոսի 29-ին արտադրված «Green Land» ապրանքային նշանով տոմատի մածուկի առնչությամբ «Արաս ֆուդ» ընկերության և Ընկերության վարքագծում անբարեխիղճ մրցակցության, այդ թվում՝ հասարակության մոլորեցման դրսևորումներով անբարեխիղճ մրցակցության հատկանիշների առերևույթ առկայության հիմքով:

3. Ընկերության դիրքորոշումը.

Ընկերությունը 2024 թվականի օգոստոսի 5-ին ներկայացրել է միջնորդություն (այսուհետ նաև՝ **Միջնորդություն 1**)՝ հայտնելով, որ ընդունում է թիվ ՀԳ-02404/24 վարույթով իրեն վերագրվող իրավախախտման փաստը:

Միաժամանակ Ընկերությունը հայտնել է, որ թիվ ՀԳ-02404/24 վարույթով քննարկվող «Эко Солт» և «MG FOOD» ապրանքային նշաններով տոմատի մածուկները վաճառքում և պահեստներում առկա չեն:

Ընկերությունը 2024 թվականի օգոստոսի 5-ին ներկայացրել է միջնորդություն (այսուհետ նաև՝ **Միջնորդություն 2**)՝ հայտնելով, որ ընդունում է թիվ ՀԳ-02607/24 վարույթով իրեն վերագրվող իրավախախտման փաստը:

Միաժամանակ Ընկերությունը հայտնել է, որ թիվ ՀԳ-02607/24 վարույթով քննարկվող «Green Land» ապրանքային նշանով տոմատի մածուկ վաճառքում և պահեստներում առկա չէ:

4. Հանձնաժողովի կողմից պահանջված և ստացված փաստաթղթերը և այլ տեղեկատվությունը.

1. Հանձնաժողովի նախագահի 2024 թվականի ապրիլի 4-ի «Հսկիչ գնում իրականացնելու մասին» թիվ 212-Ա հրամանի հիման վրա «Շառոյան եղբայրներ» սահմանափակ պատասխանատվությամբ ընկերությանը պատկանող առևտրի օբյեկտում իրականացվել է հսկիչ գնում (այսուհետ նաև՝ **Հսկիչ գնում 1**), որի արդյունքում կազմվել է «Հսկիչ գնման արդյունքների վերաբերյալ» թիվ 212 արձանագրությունը:

Հսկիչ գնում 1-ի արդյունքում ձեռք է բերվել Ընկերության կողմից 2023 թվականի դեկտեմբերի 6-ին արտադրված «Эко Солт» ապրանքային նշանով տոմատի մածուկ, որի տարային փակցված պիտակի վրա առկա է հետևյալը. «Эко Солт» տոմատի մածուկ, $25 \pm 2\%$: Բաղադրություն՝ տոմատի մածուկ, աղ շաքար, ջուր: Չոր նյութերի զանգվածային մասը՝ $25 \pm 2\%$: Սննդային արժեքը 100գ մթերքում, ածխաջրեր 15.8գ, էներգետիկ արժեքը 79 կկալ (331 կջ): Ստերիլիզացված է: Պահպանման պայմանները 0°C -ից մինչև $+25^{\circ}\text{C}$ -ի և 75% ոչ ավելի օդի հարաբերական խոնավության պայմաններում 36 ամիս: Բաց տուփը պահել սառնարանում ոչ ավել քան 3օր: Պահպանման ժամկետը 3 տարի: Արտադրվել է 06.12.2023: Արտադրող՝ «Հայրենյաց բարիքներ» ՍՊԸ: Հեռ.՝ +37499134343: Հասցե՝ ՀՀ, ք.Երևան, Նուբարաշեն», (այսուհետ նաև՝ **Ապրանք 1**):

2. Հանձնաժողովի նախագահի 2024 թվականի ապրիլի 4-ի «Հսկիչ գնում իրականացնելու մասին» թիվ 215-Ա հրամանի հիման վրա «Ալեքսարս» սահմանափակ պատասխանատվությամբ ընկերությանը պատկանող առևտրի օբյեկտում իրականացվել է հսկիչ գնում (այսուհետ նաև՝ **Հսկիչ գնում 2**), որի արդյունքում կազմվել է «Հսկիչ գնման արդյունքների վերաբերյալ» թիվ 215 արձանագրությունը:

Հսկիչ գնում 2-ի արդյունքում ձեռք է բերվել Ընկերության կողմից 2023 թվականի դեկտեմբերի 10-ին արտադրված «MG FOOD» ապրանքային նշանով տոմատի մածուկ, որի տարային փակցված պիտակի վրա առկա է հետևյալը. «Արտադրված է «Հայրենյաց Բարիքներ» ՍՊԸ-ում, ՀՀ ք. Երևան, Նոր Արեշ 19 փողոց 10/1, Հեռ. 011 87 87 00 Պահել 0-ից մինչև 25°C և ոչ ավել 75% հարաբերական խոնավության պայմաններում: Բացելուց հետո պահել 0-ից մինչև 5°C պայմաններում, ոչ ավել 3 օր: Խտությունը $25 \pm 2\%$: 1060 գ: Բաղադրությունը՝ տոմատի մածուկ, աղ, շաքար, ջուր: Սննդային արժեքը 100գ-ում՝ ածխաջրեր 15.8գ: էներգետիկ արժեքը՝ 63.2/265կկալ/կջ: Վիտամիններ Բ կարոտին-0.7 մգ, Ca-28.3մգ, Mg-34մգ, Fe-1.3մգ: Պահպանման ժամկետը՝ 3 տարի: ՏՊ AM 00432122.7978-2017: Արտադրված է 10.12.2023», (այսուհետ նաև՝ **Ապրանք 2**):

3. Հանձնաժողովի նախագահի 2024 թվականի ապրիլի 1-ի «Հսկիչ գնում իրականացնելու մասին» թիվ 199-Ա հրամանի հիման վրա «Մերսի Թրեյդ» սահմանափակ պատասխանատվությամբ ընկերությանը պատկանող առևտրի օբյեկտում իրականացվել է հսկիչ գնում (այսուհետ նաև՝ **Հսկիչ գնում 3**), որի արդյունքում կազմվել է «Հսկիչ գնման արդյունքների վերաբերյալ» թիվ 199 արձանագրությունը:

Հսկիչ գնում 3-ի արդյունքում ձեռք է բերվել բերվել «Հայրենյաց բարիքներ» ընկերության կողմից, «Արաս Ֆուդ» ընկերության պատվերով 2023 թվականի օգոստոսի 29-ին արտադրված «Green Land» ապրանքային նշանով տոմատի մածուկ, որի տարային փակցված պիտակի վրա առկա է հետևյալը. «25±2% ПРЯМО С ОГОРОДА Զտաքաշը 1030 գ/հ: Արտադրող «Հայրենյաց բարիքներ» ՍՊԸ, «Արաս Ֆուդ» ՍՊԸ-ի պատվերով, ՀՀ, 0061, ք.Երևան, Շահամիրյանների 7/5 Ա: Հեռ. 010-44-86-09: Բաղադրությունը տոմատի մածուկ, աղ, շաքար, ջուր: Չոր նյութերի զանգվածային մասը 25±2%: Սննդային արժեքը 100գ մթերքում, ածխաջրեր 15.8գ, էներգետիկ արժեքը 63,2 կկալ (266,7 կջ): Ստերիլիզացված է: Պահպանման պայմանները 0°C-ից մինչև +25°C-ի և 75% ոչ ավելի օդի հարաբերական խոնավության պայմաններում 36 ամիս: Բաց տուփը պահել սառնարանում ոչ ավել քան 3 օր: Պահպանման ժամկետը 3 տարի: Արտադրվել է 29.08.2023», (այսուհետ նաև՝ **Ապրանք 3**):

4. Հանձնաժողովի գլխավոր քարտուղարի 2024 թվականի մայիսի 3-ի «Փորձաքննություն իրականացնելու մասին» թիվ 114-Ա հրամանի հիման վրա, ի թիվս այլ ապրանքների, Ապրանք 1-ը, Ապրանք 2-ն և Ապրանք 3-ն ուղարկվել են «Հանրապետական անասնաբուժասանիտարական և բուսասանիտարական լաբորատոր ծառայությունների կենտրոն» պետական ոչ առևտրային կազմակերպություն (այսուհետ նաև՝ **ՊՈԱԿ**)՝ դրանցում չոր նյութերի, քլորիդների (աղերի) զանգվածային մասը և շաքարի առկայությունը պարզելու նպատակով:

ՊՈԱԿ-ը 2024 թվականի մայիսի 27-ին Հանձնաժողով է ներկայացրել 2024 թվականի մայիսի 20-ի թիվ 3566 փորձարկման արձանագրությունը (այսուհետ նաև՝ **Փորձարկման արձանագրություն**), որի համաձայն՝ Ապրանք 1-ում լուծված չոր նյութերի զանգվածային մասը (առանց քլորիդների) փաստացի կազմում է 17.8%, Ապրանք 2-ում՝ 20.0%, իսկ քլորիդների զանգվածային մասը՝ Ապրանք 1-ում՝ 3.4%, Ապրանք 2-ում՝ 2.3%, Ապրանք 3-ում՝ 2.9% և չի համապատասխանում Տոմատային խտացրած մթերքների ընդհանուր տեխնիկական պայմանների միջպետական ստանդարտի (ԳՕՍՏ 3343-2017, այսուհետ նաև՝ **ԳՕՍՏ**) և Մաքսային միության հանձնաժողովի 2011 թվականի դեկտեմբերի 9-ի թիվ 880 որոշմամբ ընդունված «Սննդամթերքի անվտանգության մասին» Մաքսային միության տեխնիկական կանոնակարգին:

5. Հանձնաժողովի նախագահի 2024 թվականի հուլիսի 3-ի թիվ 7546 գրությամբ Հանձնաժողովը դիմել է ՊԵԿ-ին՝ խնդրելով տրամադրել Ընկերության կողմից 2023 թվականին հաշվարկային փաստաթղթերի և ՀԴՄ կտրոնների միջոցով իրականացված բոլոր գործարքների վերաբերյալ տեղեկատվությունը:

ՊԵԿ-ը 2024 թվականի հուլիսի 10-ին տրամադրել է հայցված տեղեկատվությունը, որի համաձայն՝ Ընկերության 2023 թվականին «Տոմատի մածուկ» ապրանքի իրացումից ստացված հասույթի չափը կազմում է ՀՀ դրամ:

6. ՊԵԿ-ի տեղեկատվական տվյալների շտեմարանում առկա տվյալների համաձայն՝ Ընկերության 2023 թվականի հասույթի չափը կազմում է ՀՀ դրամ:

5. Գործի բազմակողմանի, լրիվ և օբյեկտիվ քննարկման արդյունքում Հանձնաժողովը հաստատված է համարում հետևյալ փաստական հանգամանքները.

1. Թիվ ՀԳ-02404/24 վարույթը հարուցվել է Ընկերության կողմից արտադրված Ապրանք 1-ի և Ապրանք 2-ի առնչությամբ Ընկերության վարքագծում անբարեխիղճ մրցակցության, այդ թվում՝ հասարակության մոլորեցման դրսևորումներով անբարեխիղճ մրցակցության հատկանիշների առերևույթ առկայության հիմքով:

2. Թիվ ՀԳ-02607/24 վարույթը հարուցվել է Ընկերության կողմից արտադրված Ապրանք 3-ի առնչությամբ Ընկերության վարքագծում անբարեխիղճ մրցակցության, այդ թվում՝ հասարակության մոլորեցման դրսևորմամբ անբարեխիղճ մրցակցության հատկանիշների առերևույթ առկայության հիմքով:

3. Ընկերությունն ընդունել է թիվ ՀԳ-02404/24 և թիվ ՀԳ-02607/24 վարույթներով իրեն վերագրվող իրավախախտման փաստը՝ հայտնելով, որ թիվ ՀԳ-02404/24 և թիվ ՀԳ-02607/24 վարույթներով քննարկվող «Эко Солт», «MG FOOD» և «Green Land» ապրանքային նշաններով տոմատի մածուկները վաճառքում և պահեստներում առկա չեն:

4. Հանձնաժողովը թիվ 480-Ա և 479-Ա որոշումներով բավարարել է Միջնորդություն 1-ը և Միջնորդություն 2-ը և կիրառել է արագացված վարույթ:

5. ՊԵԿ-ի կողմից տրամադրված տեղեկատվության համաձայն՝ Ընկերության 2023 թվականին «Տոմատի մածուկ» ապրանքի իրացումից ստացված հասույթի չափը կազմում է

6. ՊԵԿ-ի տեղեկատվական տվյալների շտեմարանում առկա տվյալների համաձայն՝ Ընկերության 2023 թվականի հասույթի չափը կազմում է ՀՀ դրամ:

6. Վարույթի փաստական հանգամանքների և վերաբերելի իրավական նորմերի ուսումնասիրության և վերլուծության արդյունքում Հանձնաժողովը եզրահանգում է հետևյալին.

1) Ընկերության կողմից իրավախախտում կատարված լինելու հարցի կապակցությամբ.

Թիվ ՀԳ-02404/24 վարույթը հարուցվել է Ընկերության կողմից արտադրված Ապրանք 1-ի և Ապրանք 2-ի առնչությամբ Ընկերության վարքագծում անբարեխիղճ մրցակցության, այդ թվում՝ հասարակության մոլորեցման դրսևորումներով անբարեխիղճ մրցակցության հատկանիշների առերևույթ առկայության հիմքով:

Թիվ ՀԳ-02607/24 վարույթը հարուցվել է Ընկերության կողմից արտադրված Ապրանք 3-ի առնչությամբ Ընկերության վարքագծում անբարեխիղճ մրցակցության, այդ թվում՝

հասարակության մոլորեցման դրսևորմամբ անբարեխիղճ մրցակցության հատկանիշների առերևույթ առկայության հիմքով:

Հաշվի առնելով վերոգրյալը՝ Հանձնաժողովը, նախևառաջ, հարկ է համարում անդրադառնալ այն հարցադրման պարզաբանմանը, թե ինչպես է դրսևորվում անբարեխիղճ մրցակցության, այդ թվում՝ հասարակության մոլորեցմամբ անբարեխիղճ մրցակցության օբյեկտիվ կողմը:

«Տնտեսական մրցակցության պաշտպանության մասին» օրենքի (այսուհետ նաև՝ **Օրենք**) 16-րդ հոդվածի 1-ին մասի համաձայն՝ անբարեխիղճ մրցակցություն է համարվում տնտեսավարող սուբյեկտի ցանկացած գործողություն կամ վարքագիծ, որը հակասում է սույն օրենքին, այլ օրենքներին, նորմատիվ իրավական ակտերին կամ գործարար շրջանառության սովորույթներին, խախտում է տնտեսավարող սուբյեկտների միջև կամ վերջիններիս ու սպառողների կամ ձեռք բերողների միջև բարեխղճության՝ ազնվության, արդարության, ճշմարտության և (կամ) անաչառության սկզբունքները:

Օրենքի 16-րդ հոդվածի 2-րդ մասի համաձայն՝ անբարեխիղճ մրցակցությունն արգելվում է:

Օրենքի 16-րդ հոդվածի 3-րդ մասի համաձայն՝ անբարեխիղճ մրցակցություն են սույն օրենքի 17-24-րդ հոդվածներում նախատեսված դեպքերը, ինչպես նաև սույն հոդվածի 1-ին մասի հատկանիշներին համապատասխանող այլ գործողությունները:

Վերոնշյալ իրավանորմերի համակարգային վերլուծությունից հետևում է, որ օրենսդիրը սահմանել է գործողությունը անբարեխիղճ դիտարկելու երկու եղանակ. մի դեպքում անբարեխիղճ մրցակցության դեպքերն են Օրենքի 16-24-րդ հոդվածներով սահմանված առանձին դրսևորումները, մյուս դեպքում՝ Օրենքի 16-րդ հոդվածի 1-ին մասի հատկանիշները պարունակող գործողությունները, այն է՝ տնտեսավարող սուբյեկտի ցանկացած գործողություն կամ վարքագիծ, որը.

1. հակասում է Օրենքին, այլ օրենքներին, նորմատիվ իրավական ակտերին կամ գործարար շրջանառության սովորույթներին,

2. խախտում է մրցակիցների միջև կամ վերջիններիս ու սպառողների կամ ձեռք բերողների միջև բարեխղճության՝ ազնվության, արդարության, ճշմարտության և (կամ) անաչառության սկզբունքները:

Օրենքի 21-րդ հոդվածի 1-ին մասի համաձայն՝ անբարեխիղճ մրցակցություն է համարվում հասարակության մոլորեցումը, այդ թվում՝

1) ցանկացած գործողություն կամ վարքագիծ, որը մոլորեցնում է կամ կարող է մոլորեցնել հասարակությանը տնտեսավարող սուբյեկտի, նրա գործունեության կամ առաջարկած ապրանքների, դրանց գովազդմանը, տարածմանը կամ իրացմանը նպաստող միջոցառումների, ապրանքի աշխարհագրական ծագման կամ սույն օրենքի 20-րդ հոդվածում թվարկված բնութագրերի կամ պայմանների վերաբերյալ.

2) ապրանքների որակն անհիմն չափազանցնելը կամ որակի, քանակի կամ այլ բնութագրերի կամ ապրանքների ձեռքբերման կամ իրացման վերաբերյալ համապատասխան տեղեկատվություն չհիշատակելը կամ տեղեկատվությունն այն ձևով

ներկայացնելը, որը կարող է հանգեցնել թյուր տպավորության ստեղծման (ապակողմնորոշման)։

3) գովազդի մեջ (գովազդելու ընթացքում) կամ իրացման ընթացքում թերի կամ կեղծ կամ ոչ լիարժեք տվյալների (տեղեկությունների) նշումը կամ այնպիսի տվյալների (տեղեկությունների) բացակայությունը կամ տվյալների (տեղեկությունների) այն ձևով նշումը, որն սպառողին հնարավորություն չի տալիս ամբողջական պատկերացում կազմելու իրացվող կամ գովազդվող ապրանքի կամ տնտեսավարող սուբյեկտի վերաբերյալ։

4) օրենքին հակասող, այդ թվում՝ անբարեխիղճ կամ հակաօրինական կամ հավաստիության կամ պատշաճության խախտմամբ իրականացվող գովազդները, որոնք կարող են կանխել, սահմանափակել կամ արգելել տնտեսական մրցակցությունը կամ վնասել սպառողների շահերը։

Վերոնշյալից հետևում է, որ օրենսդիրը հասարակության մոլորեցման դրսևորմամբ անբարեխիղճ մրցակցության օբյեկտիվ կողմի սպառիչ ցանկ չի սահմանել, այլ մասնավորեցրել է դրանցից մի քանիսը, որոնք արտահայտվում են.

1) ապրանքի բնութագրերի կամ իրացման պայմանների վերաբերյալ թյուր տպավորության՝ ապակողմնորոշելու հնարավորության ստեղծմամբ, այդ թվում՝ ապրանքների ձեռքբերման կամ իրացման վերաբերյալ համապատասխան տեղեկատվություն չհիշատակելու եղանակով։

2) սպառողին գովազդվող կամ իրացվող ապրանքի վերաբերյալ ամբողջական պատկերացում կազմելու հնարավորություն չտալով, այդ թվում՝ թերի, կեղծ կամ ոչ լիարժեք տվյալներ նշելու եղանակով։

3) տնտեսական մրցակցությունը կանխող, սահմանափակող կամ արգելող կամ սպառողների շահերը վնասող օրենքին հակասող գովազդով։

4) ցանկացած այլ դրսևորմամբ, որը ստեղծում է տնտեսավարող սուբյեկտի, նրա գործունեության կամ առաջարկած ապրանքների, դրանց բնութագրերի կամ այլ պայմանների վերաբերյալ մոլորեցնելու հնարավորություն։

Ընդ որում, միևնույն վարքագիծը միաժամանակ կարող է համապատասխանել հասարակության մոլորեցման մեկից ավելի դրսևորումներին։ Այսպես, օրինակ՝ ապրանքների ձեռքբերման կամ իրացման վերաբերյալ համապատասխան տեղեկատվություն չհիշատակելը կարող է ոչ միայն ամբողջական պատկերացում կազմելու հնարավորություն չտալ, այլ նաև ստեղծել թյուր տպավորության՝ ապակողմնորոշելու հնարավորություն։

Մաքսային միության հանձնաժողովի 2011 թվականի դեկտեմբերի 9-ի թիվ 882 որոշմամբ ընդունված «Մրգերից և բանջարեղենից ստացված հյութամթերքի տեխնիկական կանոնակարգ» Մաքսային միության տեխնիկական կանոնակարգի (ՄՄ ՏԿ 023/2011) 2-րդ հոդվածի 7-րդ կետի 2-րդ պարբերության և ԳՕՍՏ-ի 5-րդ բաժնի 2-րդ մասի 2-րդ աղյուսակի համաձայն՝ տոմատի մածուկի մեջ լուծվող չոր նյութերի զանգվածային մասը չպետք է պակաս լինի 25%-ից։

ԳՕՍՏ-ի 5-րդ բաժնի 2-րդ մասի 7-րդ կետի համաձայն՝ խտացված լոլիկի արտադրանքի արտադրության մեջ չի թույլատրվում ավելացնել աղ, շաքարավազ, խտացուցիչներ և բուրավետիչներ:

ԳՕՍՏ-ի 5-րդ բաժնի 2-րդ մասի 2-րդ աղյուսակի համաձայն՝ տոմատի մածուկի բաղադրության կազմում քլորիդների զանգվածային բաժինը չպետք է ավել լինի 1.0%-ից:

Ընկերությունը Միջնորդություն 1-ով ընդունել է թիվ ՀԳ-02404/24 վարույթով իրեն վերագրվող իրավախախտման փաստը՝ հայտնելով, որ թիվ ՀԳ-02404/24 վարույթով քննարկվող «Эко Солт» և «MG FOOD» ապրանքային նշաններով տոմատի մածուկները վաճառքում և պահեստներում առկա չեն:

Ընկերությունը Միջնորդություն 2-ով ընդունել է թիվ ՀԳ-02607/24 վարույթով իրեն վերագրվող իրավախախտման փաստը՝ հայտնելով, որ թիվ ՀԳ-02607/24 վարույթով քննարկվող «Green Land» ապրանքային նշանով տոմատի մածուկ վաճառքում և պահեստներում առկա չէ:

Հանձնաժողովը թիվ 480-Ա որոշմամբ բավարարել է Միջնորդություն 1-ը և կիրառել է արագացված վարույթ:

Հանձնաժողովը թիվ 479-Ա որոշմամբ բավարարել է Միջնորդություն 2-ը և կիրառել է արագացված վարույթ:

Օրենքի 88-րդ հոդվածի 1-ին մասի համաձայն՝ տնտեսական մրցակցության բնագավառում իրավախախտման վերաբերյալ վարույթ հարուցելու մասին որոշումն ստանալու օրվանից երկշաբաթյա ժամկետում, իսկ սույն օրենքի 64-րդ հոդվածի 1-ին մասով սահմանված ժամկետի երկարաձգման դեպքում երկարաձգված ժամկետում վարույթով պատասխանողը իրեն վերագրվող իրավախախտման հետևանքները վերացրած լինելու և իրավախախտման փաստն ընդունելու, իսկ սույն օրենքի 73-րդ հոդվածով նախատեսված դեպքում միայն իրավախախտման փաստն ընդունելու դեպքում կարող է արագացված վարույթ կիրառելու մասին միջնորդություն ներկայացնել Հանձնաժողով: Այն դեպքում, երբ իրավախախտման հետևանքները վերացնելն անհնար է, իրավախախտման հետևանքները վերացված լինելու պայմանը իրավախախտման փաստի ընդունման դեպքում համարվում է առկա:

Օրենքի 88-րդ հոդվածի 2-րդ մասի համաձայն՝ արագացված վարույթ կիրառելու մասին միջնորդություն ներկայացվելու դեպքում վարույթով պատասխանողը չի կարող հետազայում հերքել իր կողմից իրավախախտում կատարելու փաստը:

Օրենքի 88-րդ հոդվածի 5-րդ մասի համաձայն՝ արագացված վարույթ կիրառելու մասին որոշում կայացվելու դեպքում գործի՝ ըստ էության քննությանն ուղղված գործողություններ չեն իրականացվում, և գնահատվում են միայն պատասխանատվությունը մեղմացնող և ծանրացնող հանգամանքները:

Հաշվի առնելով վերոգրյալը՝ Հանձնաժողովն արձանագրում է, որ Ընկերության կողմից արտադրված Ապրանք 1-ը, Ապրանք 2-ն և Ապրանք 3-ն որպես տոմատի մածուկ իրացնելն այն դեպքում, երբ Ապրանք 1-ում լուծված չոր նյութերի զանգվածային մասը (առանց քլորիդների) փաստացի կազմում է 17.8%, Ապրանք 2-ում՝ 20.0%, իսկ քլորիդների զանգվածային մասը՝ Ապրանք 1-ում՝ 3.4%, Ապրանք 2-ում՝ 2.3%, Ապրանք 3-ում՝ 2.9% և չեն

համապատասխանում Տոմատային խտացրած մթերքների ընդհանուր տեխնիկական պայմանների միջպետական ստանդարտի (ԳՕՍՏ 3343-2017) պահանջներին, պարունակում է անբարեխիղճ մրցակցություն, այդ թվում՝ հասարակության մոլորեցման դրսևորումներով անբարեխիղճ մրցակցության հատկանիշներ, որի կապակցությամբ օրենսդրությամբ նախատեսված է իրավական հետևանք՝ պատասխանատվության միջոցի կիրառում:

2) Հնկերության նկատմամբ պատասխանատվության միջոց կիրառելու հարցի կապակցությամբ.

Օրենքի 92-րդ հոդվածի համաձայն՝ տնտեսական մրցակցության բնագավառում իրավախախտման համար Հանձնաժողովն իրավասու է տնտեսավարող սուբյեկտներին, պետական մարմիններին և դրանց պաշտոնատար անձանց տալու նախազգուշացում կամ նշանակելու տուգանք:

Օրենքի 93-րդ հոդվածի 7-րդ մասի համաձայն՝ անբարեխիղճ մրցակցության համար նշանակվող տուգանքի չափը կազմում է տնտեսավարող սուբյեկտի՝ տվյալ իրավախախտմանը նախորդող տարվա հասույթի մինչև հինգ տոկոսը:

Օրենքի 93-րդ հոդվածի 13-րդ մասի համաձայն՝ նախորդ տարում 12 ամսից պակաս գործունեություն իրականացրած լինելու դեպքում սույն հոդվածով նախատեսված տուգանքների չափը կազմում է իրավախախտմանը նախորդող, բայց ոչ ավելի, քան 12 ամսվա գործունեության ժամանակահատվածի հասույթի նկատմամբ սույն հոդվածում նախատեսված տոկոսը:

Օրենքի 94-րդ հոդվածի 1-ին մասի համաձայն՝ պատասխանատվության միջոց կիրառելիս Հանձնաժողովը հաշվի է առնում տվյալ իրավախախտման բնույթը, տևողությունը, իրավախախտման հնարավոր կամ փաստացի ազդեցությունը շուկայում մրցակցային իրավիճակի կամ սպառողների շահերի վրա, տնտեսավարող սուբյեկտի կողմից տվյալ խախտման կրկնակիությունը, եթե նախորդ խախտման համար պատասխանատվության միջոց կիրառելու օրվանից չի անցել հինգ տարի, տնտեսավարող սուբյեկտի դիտավորության աստիճանը, տնտեսավարող սուբյեկտի կողմից իրավախախտում կատարվելու շարժառիթները և հանգամանքները, տնտեսավարող սուբյեկտի կողմից իրավախախտում կատարվելու փաստն ընդունելու կամ Հանձնաժողովի հետ համագործակցելու հանգամանքը, պատասխանատվությունից ազատելու հիմքերը, տնտեսավարող սուբյեկտի վրա նշանակվող տուգանքի հնարավոր ազդեցությունը, տվյալ տնտեսավարող սուբյեկտի գործունեության ոլորտը և տնտեսավարող սուբյեկտի պատմությունը:

Օրենքի 37-րդ հոդվածի 1-ին մասի 21-րդ կետի համաձայն՝ Հանձնաժողովը սահմանում է պատասխանատվության միջոցի ընտրության և տուգանքի հաշվարկման մեթոդաբանությունը:

Օրենքի 94-րդ հոդվածի 4-րդ մասի համաձայն՝ պատասխանատվության միջոցի ընտրության և տուգանքի հաշվարկման մեթոդաբանությունը սահմանվում է Հանձնաժողովի ենթաօրենսդրական նորմատիվ իրավական ակտով:

Օրենքի 88-րդ հոդվածի 7-րդ մասի համաձայն՝ արագացված վարույթի կիրառման արդյունքում պատասխանատվության միջոց կիրառելիս պատասխանատվության միջոցը չի կարող գերազանցել տվյալ իրավախախտման համար նախատեսված ամենախիստ պատասխանատվության միջոցի մեկ երկրորդը:

Հանձնաժողովի 2021 թվականի դեկտեմբերի 28-ի «Պատասխանատվության միջոցի ընտրության և տուգանքի հաշվարկման մեթոդաբանությունը սահմանելու մասին» թիվ 395-Ն որոշմամբ (այսուհետ նաև՝ **թիվ 395-Ն որոշում**) սահմանված պատասխանատվության միջոցի ընտրության և տուգանքի հաշվարկման մեթոդաբանության (այսուհետ նաև՝ **Մեթոդաբանություն**) 1-ին կետի համաձայն՝ պատասխանատվության միջոցի ընտրության և տուգանքի հաշվարկման մեթոդաբանությունը կարգավորում է Հանձնաժողովի կողմից Օրենքով սահմանված տնտեսական մրցակցության բնագավառում պատասխանատվության միջոցների ընտրության և տուգանքի հաշվարկման հետ կապված հարաբերությունները:

Մեթոդաբանության 9-րդ կետի համաձայն՝ տուգանքը հաշվարկվում է հետևյալ բանաձևով.

$$S = P + P \times (\Sigma - U)$$

Որտեղ՝

S-տուգանքի չափն է,

P-տուգանքի բազային գումարը,

Ծ-ծանրացնող բոլոր հանգամանքների համար սահմանված տոկոսների հանրագումարը,

Մ-մեղմացնող բոլոր հանգամանքների համար սահմանված տոկոսների հանրագումարը:

Բազային գումարի հաշվարկը.

Մեթոդաբանության 11-րդ կետի 2-րդ ենթակետի համաձայն՝ երկրորդ խումբ իրավախախտումների դեպքում կիրառվող մեթոդը վերաբերում է անբարեխիղճ մրցակցությանը, բացառությամբ ակցիաների:

Մեթոդաբանության 21-րդ կետի համաձայն՝ երկրորդ խումբ իրավախախտումների դեպքում կիրառվող տուգանքի բազային գումարը հաշվարկվում է $P = \angle \times 2.5\% \times \theta$ բանաձևով, որտեղ՝

P-ն տուգանքի բազային գումարն է,

Հ-ն ապրանքի իրացումից ստացված հասույթն է կամ ընդհանուր հասույթի կեսն է,

Ժ-ն իրավախախտման տևողության գործակիցն է:

Ապրանքի իրացումից ստացված հասույթ.

Մեթոդաբանության 2-րդ կետի 1-ին ենթակետի համաձայն՝ ապրանք է համարվում տվյալ իրավախախտման առնչությամբ Հանձնաժողովի կողմից հատկորոշված ապրանքային շուկայի ապրանքատեսակային սահմանում ներգրավված ապրանքը, իսկ ապրանքային շուկա հատկորոշված չլինելու դեպքում՝ ապրանքը, որն իրավախախտման հետևանքով ստացել է կամ կարող էր ստանալ իրացման համար առավելություն, իսկ դա

որոշելու անհնարինության դեպքում՝ Էկոնոմիկայի նախարարի 2013 թվականի սեպտեմբերի 19-ի N 875-Ն հրամանի 1-ին կետով հաստատված հավելվածով նախատեսված դասակարգչի, ըստ հաջորդականության, ենթակարգում, ենթակարգում առանձնացված չլինելու դեպքում՝ կարգում, կարգում առանձնացված չլինելու դեպքում՝ դասում և դասում առանձնացված չլինելու դեպքում՝ խմբում ներառված ապրանքը:

Մեթոդաբանության 2-րդ կետի 5-րդ ենթակետի համաձայն՝ համապատասխան ժամանակահատվածը Հանձնաժողովի կողմից վարույթ հարուցելու մասին որոշման ընդունման պահին դադարեցված իրավախախտումների դեպքում՝ իրավախախտման դադարեցմանը նախորդող տարին է: Հանձնաժողովի կողմից վարույթ հարուցելու մասին որոշման ընդունման պահին չդադարեցված իրավախախտումների դեպքում՝ Հանձնաժողովի կողմից վարույթ հարուցելու մասին որոշման ընդունմանը նախորդող տարին է: Իրավախախտման դադարեցման կամ վարույթ հարուցելու մասին որոշման ընդունմանը նախորդող տարում 12 ամբողջական ամսից պակաս գործունեություն իրականացրած լինելու դեպքում՝ իրավախախտման դադարեցման կամ վարույթ հարուցելու մասին որոշման ընդունմանը նախորդող, բայց ոչ ավել քան 12 ամբողջական ամսվա գործունեության ժամանակահատվածն է:

Մեթոդաբանության 22-րդ կետի համաձայն՝ բազային գումարի հաշվարկման համար հիմք ընդունվող հասույթի ընտրությունն իրականացվում է Մեթոդաբանության 15-րդ, 16-րդ և 17-րդ կետերով սահմանված կարգով:

Մեթոդաբանության 15-րդ կետի համաձայն՝ բազային գումարի հաշվարկման համար հիմք է ընդունվում ապրանքի իրացումից ստացված հասույթը:

Մեթոդաբանության 16-րդ կետի համաձայն՝ բազային գումարի հաշվարկման համար ապրանքի իրացումից ստացված հասույթի փոխարեն հիմք է ընդունվում ընդհանուր հասույթը, եթե.

1) իրավախախտումը չի առնչվում որևէ ապրանքի հետ.

2) կիրառվող բազային գումարը հաշվարկվում է անձանց խմբում ընդգրկված այն տնտեսավարող սուբյեկտի նկատմամբ, որը չունի ապրանքի իրացումից ստացված հասույթ.

3) պետական մարմնից ստացված տեղեկատվության հիման վրա հնարավոր չէ գնահատել ապրանքի իրացումից ստացված հասույթը և տնտեսավարող սուբյեկտը չի ներկայացրել ապացույցներ ընդհանուր հասույթի, ապրանքի իրացումից ստացված հասույթի և դրանց գոյացման հիմքերի վերաբերյալ:

Մեթոդաբանության 17-րդ կետի համաձայն՝ եթե ապրանքի իրացումից ստացված հասույթի կամ ընդհանուր հասույթի վերաբերյալ պետական մարմնից ստացված տեղեկատվությունը ներառում է համապատասխան ժամանակահատվածը չընդգրկող ամիսներ և առանձնացված չեն համապատասխան ժամանակահատվածում ներառված ամիսներին ստացված հասույթները, ապա տուգանքի բազային գումարի հաշվարկման համար համապատասխան ժամանակահատվածը չընդգրկող ամիսների հասույթը նվազեցվում է: Նվազեցվող հասույթի գումարը յուրաքանչյուր ամսվա համար հավասար է

տվյալ հաշվետու ժամանակաշրջանի համար ներկայացված հասույթի գումարի և այդ ժամանակաշրջանում ներառված ամիսների հարաբերակցությանը:

Տվյալ դեպքում Հանձնաժողովը բազային գումարը հաշվարկելիս դիտարկում է Ընկերության 2023 թվականի «Տոմատի մածուկ» ապրանքի իրացումից ստացված հասույթի չափը, որը կազմում է << դրամ:

իրավախախտման տևողությունը.

Մեթոդաբանության 19-րդ կետի համաձայն՝ իրավախախտման տևողության գործակիցը հաշվարկվում է հետևյալ բանաձևով.

$$\sigma = U/12$$

Որտեղ՝

σ -ն իրավախախտման տևողության գործակիցն է.

U-ն դիտարկվող ժամանակահատվածն է:

Մեթոդաբանության 23-րդ կետի համաձայն՝ եթե դիտարկվող ժամանակահատվածը չի գերազանցում 12 ամբողջական ամիսը, ապա իրավախախտման տևողության գործակիցը հաշվարկվում է 1, իսկ եթե դիտարկվող ժամանակահատվածը 12 ամբողջական ամսից ավելի է՝ իրավախախտման տևողության գործակիցը հաշվարկվում է 1.5:

Մեթոդաբանության 2-րդ կետի 8-րդ ենթակետի համաձայն՝ դիտարկվող ժամանակահատվածը Հանձնաժողովի կողմից վարույթ հարուցելու մասին որոշում ընդունելու պահին դադարեցված իրավախախտումների դեպքում՝ Հանձնաժողովի կողմից վարույթի ընթացքում հաստատված իրավախախտման առաջին գործողությունից կամ վարքագծից մինչև իրավախախտման դադարեցման պահին ընկած ամբողջական ամիսների քանակն է:

Տվյալ դեպքում Հանձնաժողովը որպես իրավախախտման սկզբնաժամկետ դիտարկում է

Վերոնշյալից բխում է, որ տուգանքի բազային գումարը կազմում է ըստ հետևյալ հաշվարկի.

<< դրամ՝

$$P = C \times U \times \sigma$$

Պատասխանատվությունը ծանրացնող և մեղմացնող հանգամանքներ.

Տուգանքի հաշվարկը.

Վերոշարադրյալից հետևում է, որ տուգանքի չափը կազմում է ՀՀ դրամ՝ համաձայն հետևյալ հաշվարկի.

$$S = P + P \times (\Sigma - U) =$$

Մեթոդաբանության 47-րդ կետի համաձայն՝ արագացված վարույթի կիրառման արդյունքում տնտեսավարող սուբյեկտի նկատմամբ նշանակվող տուգանքի չափը կազմում է Մեթոդաբանությամբ հաշվարկված տուգանքի 50 տոկոսը: Այսինքն, Ընկերության նկատմամբ նշանակվող տուգանքի չափը կազմում է ՀՀ դրամ:

Մեթոդաբանության 10-րդ կետի համաձայն՝ տուգանքի վերջնական գումարը կլորացվում է դեպի ներքև 1000 ՀՀ դրամի ճշգրտությամբ, հետևաբար, Ընկերության նկատմամբ նշանակվող տուգանքի չափը կկազմի

3) Ընկերությանը հանձնարարություն տալու հարցի կապակցությամբ.

Օրենքի 37-րդ հոդվածի 1-ին մասի 3-րդ կետի համաձայն՝ Հանձնաժողովը (...) սույն օրենքը խախտելու համար տնտեսավարող սուբյեկտներին, պետական մարմիններին և նրանց պաշտոնատար անձանց ենթարկում է պատասխանատվության՝ հանձնարարելով իր սահմանած ժամկետում շտկել խախտումը և հետագայում բացառել այն:

Հաշվի առնելով այն հանգամանքը, որ Հանձնաժողովի թիվ 479-Ա և 480-Ա որոշումներով կիրառվել է արագացված վարույթ՝ Հանձնաժողովը գտնում է, որ Ընկերությանը հանձնարարություն տալու անհրաժեշտությունը բացակայում է:

7. Եզրափակիչ մաս.

Հիմք ընդունելով վերոգրյալը և ղեկավարվելով Օրենքի 37-րդ հոդվածի 1-ին մասի 3-րդ կետով, 67-րդ հոդվածի 2-րդ մասով, 88-րդ հոդվածի 6-րդ մասով, 100-րդ հոդվածի 2-րդ մասով, «Վարչարարության հիմունքների և վարչական վարույթի մասին» օրենքի 70-րդ, 71-րդ հոդվածներով և ՀՀ վարչական դատավարության օրենսգրքի 72-րդ հոդվածի 1-ին մասի 1-ին կետով՝ Հանձնաժողովը

Ո Ր Ո Շ Ե Ց

1. «Հայրենյաց բարիքներ» սահմանափակ պատասխանատվությամբ ընկերության կողմից արտադրված «Эко Солт», «MG FOOD» և «Green Land» ապրանքային նշաններով ապրանքները որպես տոմատի մածուկ իրացնելն այն դեպքում, երբ «Эко Солт» ապրանքային նշանով ապրանքում լուծված չոր նյութերի զանգվածային մասը (առանց քլորիդների) փաստացի կազմում է 17.8%, «MG FOOD» ապրանքային նշանով ապրանքում՝

20.0%, իսկ քլորիդների զանգվածային մասը՝ «Эко Солт» ապրանքային նշանով ապրանքում՝ 3.4%, «MG FOOD» ապրանքային նշանով ապրանքում՝ 2.3%, «Green Land» ապրանքային նշանով ապրանքում՝ 2.9% և չեն համապատասխանում Տոմատային խտացրած մթերքների ընդհանուր տեխնիկական պայմանների միջպետական ստանդարտի (ԳՕՍՏ 3343-2017) պահանջներին, որակել որպես անբարեխիղճ մրցակցություն, այդ թվում՝ հասարակության մոլորեցման դրսևորումներով անբարեխիղճ մրցակցություն (այսուհետ՝ **Օրենքի խախտում**):

2. Օրենքի խախտման համար «Հայրենյաց բարիքներ» սահմանափակ պատասխանատվությամբ ընկերության նկատմամբ նշանակել 1 882 000 (մեկ միլիոն ութ հարյուր ութսուներկու հազար) ՀՀ դրամի չափով տուգանք:

3. Սույն որոշումն ուժի մեջ է մտնում դրա պատճենը «Հայրենյաց բարիքներ» սահմանափակ պատասխանատվությամբ ընկերությանը հանձնելուն հաջորդող օրվանից:

4. Սույն որոշման 2-րդ կետը դրանով նշանակված տուգանքը մինչև սույն որոշման անբողոքարկելի դառնալը չվճարվելու դեպքում ենթակա է հարկադիր կատարման՝ «Դատական ակտերի հարկադիր կատարման մասին» օրենքով սահմանված կարգով:

5. Սույն որոշումը կարող է բողոքարկվել վարչական կամ դատական կարգով՝ ուժի մեջ մտնելու օրվանից երկամսյա ժամկետում:

6. Սույն որոշման բողոքարկումը չի կասեցնում դրա գործողությունը կամ կատարումը:

ՆԱԽԱԳԱՀ

2024 թ. օգոստոսի 27
Երևան

